

onser aller welvaeren hieranne is hangende, ten si wij onsen medebroeders ontsetten ende wij nu met hulpe der steeden Enchusen, Hoorn, Medenblick, Edam ende Monickendam een groote armaede van scepen ende galeyen toegerust hebben, van meeninge sijnde ten onser ontsette ofte ons te waegen ende gernerckt ons meeste mangelt an cruyt, van welcke ick u. l. corts een somme gesonden hebbe, soe is mijne ernstelicken begheert, dat ghij ons ten minste een paer hondert pont wilt senden, soe lieff u 't welvaeren van onse vaderlandt is; belove u wederomme in uwen noot te ontsetten, soe veel mij doenlyck sal wesen, verhopende uwer E. hierinne niet sal wesen in gebreecke. Vuyt Edam, den xi Martü anno xvc lxxiiij.

U. L. goede vriendt

### **Diederich Sonoy.**

Eersaeme, wijse, voirsienige Hrn.  
Burgermeesteren ende Regeerders der  
stede van Alckmaer.

### XIV.

Brief van Willem, Prins van Oranje aan de regering van Alkmaar. De Prins waarschuwt die van Alkmaar, dat de vijand een' aanslag op hunne stad voorheeft en raadt hun, om bij tijds, door het nemen van de noodige maatregelen, dien toeleg te verijdelen. (*Archief van Alkmaar.*)

Die Prince van Oraenyen, Grave van  
Nassau etc. Heere ende Baron van Breda,  
van Diest etc.

Eersame, lieve, besondere! Alsoe wij tegenwoirdelick onderricht sijn, dat die vijant zekeren aenslaech op die stadt Alckmaer heeft, waer doer hij wel verhoept dieselve stadt in corderen tijde wederom onder sijne tyrannie te brengen, hebben wij niet connen gelaten u 't selve insgelijcx bij desen te verwittigen ende te waerschouwen,

ten eynde ghij goets tijts daer inne versiet, ende, als sulken grooten ongeluck voircompt, 't zij bij innenemen van eenige knechten, ons te staede, ofte bij eenige andere middelen, die ghij oirbaerlijcxste ende bequaemste vynden sult, opdat doer geenerhande ongeluck die goede mette de quaede nyet te lijden en hebben. Ulieden daerom andermael vermanende, dat gij daerop lettet, soe als ghij totter selver stede, uwer saecke, uwer huysvrouwen ende kinderen welvaren zult bevinden behoirende.

Eersame, lieve, besondere! Onse Heere Godt sij met U. Geschreven tot Delft, xiii<sup>en</sup> dach Martij 1573.

Ulieder goede Vriendt

**Guille de Nassau.**

(Door 's Prinsen Secretaris N. Brunyck niet mede onderteekend.)

Den Eersamen, mijnen Lieven  
besunderen den Burgermeesteren  
ende Raetsheeren der stede van  
Alckmaer.

## XV.

Brief van D. Sonoy aan de regering van Alkmaar. Hij verlangt, dat de rentmeester van den impost, Augustijn van Teylingen, hem achttien honderd gulden zal voorschieten, onder borgtogt der regering van Alkmaar, ten einde dit geld te gebruiken tot betaling van het leger te Egmond. (*Archief van Alkmaar.*)

Heeren Burgermeesters! Alsoe ick nootsaekelijck gelt moet hebben tot onderhoudinghe van het leger tot Egmont ende nyet langer sonder gelt ende die knechten leeninge (1) te doene en sie bij een te houden, ende ick verstaet de Rentmeester van impost Augustyn van Teylingen omtrent achtien hondert gulden veerdich heeft, die hij te vreden

(1) *Leeninge*. Het woord leenen beteekende oorspronkelijk geven. *Leeninge te doen* is alzoo geven, en wel soldij.